



Arkivsaknr: 2024/374-215
Sakshandsamar: Kristin Nåmdal
Avdeling: Plan og utvikling

SAKSFRAMLEGG

Forvaltningsplan for Lurefjorden og Lindåsosane marine verneområde - Høyringsuttale frå Alver kommune.

Utvalssak	Utval	Møtedato
	Utval for areal, plan og miljø	

Kommunedirektøren sitt framlegg til vedtak:

Alver kommune har fyljande innspel til forvaltningsplan for Lurefjorden og Lindåsosane marine verneområde:

- Kommunedirektøren vurderer forvaltningsplan som eit verktøy for forvaltning av det marine verneområde i tråd med verneforskrifta.
- Alver kommune meiner det er viktig å ta vare på kulturminne i verneområde, ny bruk av gamle bygg er eit grep for eit levande kulturvern. Det er difor sentralt at forvaltningsstyresmakta vurderer søknaden om dispensasjonssaker i saker der ein til dømes ynskjer å bygge opp ei nedfallen sjøbu.
- I siste setning i punkt 14 «Bygningar og andre installasjonar»: «Kommunen må handsame søknad om flytebrygge først, slik at det blir handsama i tråd med kommunale planar, før det blir vurdert av forvaltningsstyresmakta for verneområdet» er i direkte strid med samordningsplikten i plan og bygningsloven § 21-5. Her må det presiserast i forskrifta kva type søknad det er meint kommunen skal behandle.
- Kommunedirektøren vil understreke at det er viktig at landbruksnæringa har høve til å drive vidare som i dag, utan nye restriksjonar enn gjeldande lovverk.
- Det er positivt at Alver kommune sine arealvurderinga i nedslagsfeltet på land, ikkje vil vere ein del av verneplanen sine retningliner.

Politisk handsaming

Saka skal til uttale i utval for areal, plan og miljø. Saka skal avgjerast i kommunestyre.

Saka gjeld

Lurefjorden og Lindåsosane er eit spesielt marint fjord- og pollsystem i ytre kyststrok. Området vart verna som Lurefjorden og Lindåsosane marine verneområde ved kongeleg resolusjon den 23. juni.2020. Verneområdet omfattar heile Lurefjorden og Lindåsosane i kommunane Alver og Austrheim. Området er om lag 70 km² stort. Verneområdet inngår i Nordhordland UNESCO Biosfæreområde.

Det er utarbeida ei verneforskrift til verneområdet. Statsforvalter har ansvar for å utarbeide ein forvaltningsplan som skal sikre ei heilskapleg forvaltning av verneområdet i tråd med verneforskrifta. Forvaltningsplanen er ei presisering og utdjuping av verneforskrifta og gir retningslinjer for dispensasjonspraksis og bruk av området.

Forvaltningsplanen er på høyring. Alver kommune har fått frist til å gje høyringssvar innan utgangen av mars.

Saksopplysningar

Bakgrunn

Verneforskrifta er gjeldande lovverk for verneområdet og regulerer kva som er tillate, kva som er forbode, og kva det kan bli gitt løyve til etter søknad om dispensasjon. Søknadar om dispensasjon frå vernereglane skal sendast til Statsforvaltaren i Vestland som er forvaltningsstyresmakt. I verneforskrifta § 5 (spesifiserte dispensasjonsreglar) er det lista opp ei rekkje tiltak som er vurdert under verneprosessen. Desse tiltaka og aktivitetane kan forvaltningsstyresmakta etter søknad vurdere om skal få dispensasjon dersom tiltaket eller aktiviteten ikkje er i strid med verneføremålet.

Vurdering

Det er statsforvalter med grunnlag i Verneforskrifta med vernekart, som har utarbeida forvaltningsplanen. Denne skal gje retningslinjer for forvaltning av området.

Forvaltningsplanen beskriv naturverdiane, bruk og brukarinteresser, forvaltningsutfordringar og aktuelle tiltak for informasjon, kartlegging og overvaking i verneområdet.

Om området

Områda som grensar til verneområdet er prega av spreidd busetnad, fritidsbustader og naust med tilhøyrande båtplassar. Det er ein god del ferdsle med båt i verneområdet, både rekreasjon, fritidsfiske og kollektivtransport. Ei hovudferdsleåre nordover langs kysten går gjennom Lurefjorden, og trafikken er stor året rundt.

Regionen er kjent for lyngheier som har vore aktivt drivne gjennom mange hundreår, men som no mange stader er i attgroing. Landområda som grensar mot Lurefjorden og Lindåsosane er for det meste utmarksområde og noko landbruksområde med husdyrbeite.

Området er mykje nytta til sjøbasert rekreasjon og friluftsliv, med stor tilhøyrande trafikk av småbåtar. Fjøra vert aktivt brukt til rekreasjon, både av fastbuande og turistar, og grunneigarar som har naust nede ved fjøra.

I Kjevikdalen har NGIR ein interkommunal gjenvinningsstasjon med deponi og steinuttak.

Nesfossen Smolt AS driv landbasert oppdrettsanlegg for oppdrett av setjefisk av laks, aure og regnbogeaure på Nesfossen.

Det er kommunale avløp innanfor verneområdet. Alver kommune drifter tre med utslepp til Lurefjorden. Det er fleire sjøkablar og mange navigasjonsinstallasjonar i verneområdet.

Det er ingen restriksjonar i høve til ferdsle i verneforskrifta for Lurefjorden og Lindåsosane marine verneområde.

Verneområdet har restriksjonar mot inngrep og aktivitetar som kan truge verneverdiane. Det er dette forvaltningsplanen set vidare rammer for.

Forvaltning av området

Forvaltning av området inneberer å utøve mynde etter verneforskrifta og gi retningslinjer, informere allmenta om verneverdiane og verneføresegn, registrere og dokumentere naturverdiar i området, planlegge og utføre skjøtsel og besøksforvaltning.

Alt som kan endre økosystemet i Lurefjorden og Lindåsosane vil utgjere eit trugsmål mot verneverdiane. Større trugsmål er fysiske inngrep som påverkar sjøbotnen, vassutskifting og straumtilhøve og ureining. Fjorden er generelt ein dårleg resipient og er sårbar for forureining.

Forvaltningsplanen har ein tiltaksdel og under vert det oppsummert kva som vil vere førande innan ulike områder.

Anlegg og innretningar: Etablering av anlegg og anleggsverksemd er i utgangspunktet forbode. Normalt vil det ikkje bli gitt løyve til utfylling, uttak og deponering av massar, sprenging, graving eller boring.

Drift og vedlikehald av anlegg: Drift og vedlikehald av eksisterande bygg, anlegg og andre innretningar som brygger og avløpsanlegg er tillate i verneområdet. All drift og vedlikehald må gjennomførast på ein slik måte at naturmangfald ikkje vert skada.

Sjøkablar og røyrleidningar: Legging av sjøkablar og røyrleidningar i verneområdet er i utgangspunktet forbode. Det vil normalt ikkje bli gitt løyve til nye inngrep i verneområdet. Drift og vedlikehald av eksisterande sjøkablar er tillate. Det kan etter søknad gis løyve til oppføring av naudsynte navigasjonsinstallasjonar og andre farleiltak

Utslepp av næringstilførsle: Det er forbode med utslepp av kjølevatn frå land, avløpsvatn og andre konsentrerte tilførsler av ureining. Forbodet mot utslepp hindrar ikkje drift av eksisterande settefiskanlegg i verneområdet.

Avløpsrøyr: Nye og eksisterande avløp frå bustader og fritidsbustader skal i størst mogleg grad bli knytt til kommunale avløpsanlegg. Dersom det ikkje er mogleg å kople seg til kommunalt anlegg, kan ein søke om dispensasjon til å leggje ut avløpsrøyr i verneområdet. Dersom det er behov for legging av ny røyrleidning: skal same trasé som den gamle bli nytta

dersom det er mogleg. Utføring av avløpsvatn er i utgangspunktet ikkje tillat etter verneforskrift.

Utslepp av avløpsvatn frå bustad og fritidsbustad: Utføring av avløpsvatn er i utgangspunktet ikkje tillate etter verneforskrifta. Dette forbodet har ikkje til føremål å hindre bustader og fritidsbustader å ha vassklosett, og det kan etter søknad gis dispensasjon.

Etablering av nye bustader eller fritidsbustader: Etablering av nye bustader eller fritidsbustader i nedslagsfeltet til det marine verneområdet skal ikkje bli vurdert etter verneforskrifta, kommunen vurderer dette etter plan og bygningslova og kommunale planar.

Flytebrygger :Tiltakshavar kan søkje om dispensasjon frå verneforskrifta for etablering av flytebrygge i verneområdet. Dette bør vere i område der det allereie er infrastruktur med eksisterande bustader og hyttefelt. Oppankring på botn må skje på stader der det ikkje øydelegg viktige naturførekomstar, og skal ikkje skje lenger ut i verneområdet enn nødvendig.

Friluftsliv: bading, symjing, padling, dykking, ferdsel med båt eller andre fartøy som vass-skuter er tillate i verneområdet.

Fiske: Fiske og hausting av viltlevande marine artar regulert i havressurslova, haustingsforskrift og lakse- og innlandsfiskelova er tillate.

Kulturminne: Forvaltningsstyresmakta kan gje dispensasjon for vedlikehald eller istandsetjing av kulturminne i verneområdet, så lenge det ikkje gir negative verknader for verneverdiane.

Landbruk: Landbruksdrift i området som grenser til sjø blir i utgangspunktet ikkje påverka av føresegnene i verneforskrifta. Tiltak og aktivitet som kan påverke det marine verneområdet vert regulert av anna lovverk.

Partar

- Alver kommune er høyringspart i saka

Kommunedirektøren si tilråding

Kommunedirektøren vurderer forvaltningsplan som eit verktøy for forvaltning av det marine verneområde i tråd med verneforskrifta. Det er opna for dispensasjonssøknader på ei rekke områder. Kommunedirektøren vil understreke at eventuelle dispensasjonssøknader må vurderast i kvar tilfelle og gjerne i dialog med Alver kommune som kjenner området godt.

For Alver kommune er det viktig at vi kan ta vare på kulturminne i verneområde, ny bruk av gamle bygg er sentralt for eit levande kulturvern. Det er difor viktig at forvaltningsstyresmakta vurderer søknaden om dispensasjonssaker i saker der ein til dømes

ynskjer å bygge opp ei nedfallen sjøbu. Alver kommune ønsker å vere positiv til eit aktivt kulturvern.

Når det gjeld siste setning punktet i punkt 14 «*Bygningar og andre installasjonar*»: «*Kommunen må handsame søknad om flytebrygge først, slik at det blir handsama i tråd med kommunale planar, før det blir vurdert av forvaltningsstyresmakta for verneområdet*» er i direkte strid med samordningsplikten i plan og bygningsloven § 21-5.

Her må det presiserast i forskrifta kva type søknad det er meint kommunen skal behandle. Vi kan behandle dispensasjonssøknader, men ikkje søknader om løyve.

Det er og slått fast at landbruksdrift i området skal ikkje bli påverka av føresegnene i verneforskrifta. Kommunedirektøren vil understreke at det er viktig at landbruksnæringa har høve til å drive vidare som i dag, utan nye restriksjonar enn gjeldande lovverk.

Det er positivt at Alver kommune sine arealvurderinga i nedslagsfeltet på land, ikkje vil vere ein del av verneplanen sine føringar. Desse vert styrt av plan og bygningslova.

Vedlegg

- 1 hoyring_framlegg-til-forvaltningsplan_lurefjorden-og-lindasosane-marine-verneomrade